

Il Bungy-Jump da Rafael Camenisch

Mes peis stattan centimeters avon il nuot. Miu tgau ha calau da patertgar. La schanuglia trembla. Jeu percorschel nuot da miu contuorn, sentel gnanc ils singuls daguots da plievgia che tuccan mias vestas. Il sulet che dat en egl a mi ei miu flad ed il dar da miu cor. Omisdus van bia pli spert che usitau.

Las davosas secundas cun tiara franca sut ils peis paran sco minutas. Sco uras. In pign mument hai jeu aunc ina leva speranza che tut quei che succeda gest seigi sulet in siemi ed jeu sededesti mintga mument. Igl ei denton negin siemi, mobein la realitad. In schem ruschna sur mias levzas. Vi jeu veramein siglir giu da quella punt? Jeu hai sterment.

In davos patratg sgola atras miu tgau: Jeu stun gie osum la pli aulta punt dall'entira Surselva. Ed ei schula era aunc atras miu tgau ch'il Rein ei enzanua lunsch sut mei. Jeu anflel denton buca la curascha da mirar surengiu. Quei ei bia memia ault! Ei vegn endamen a mi, co mia mumma sevilass sin mei, sch'ella savess tgei ch'jeu sun gest vida far. Ella schess segiramein: "Na, buca fai talas caussas. Quei ei bia memia malsegir!"

Entuorn mias stgeinas ei denton gia ina suga ligiada. Jeu declarass bugen alla mumma, daco ch'jeu vegli far quei. Per cletg ha denton il bab lubiu a mi da far bungy-jump. El ha schizun pagau il quen per mei. Lez vegn lu bein a declarar alla mumma...

Jeu hai gia adina vuliu far inaga bungy-jump. Cu jeu erel aunc pli giuvens havevel jeu viu inaga quei alla televisiun. La mumma haveva era mirau televisiun lezza gada. "Quels battan gie dil tuttafatg", haveva ella murmignau in tec nausch e midau program. Jeu sun denton buca staus dil medem meini sco la mumma. E gliez gi sun jeu sedecidius dad era inaga far bungy-jump, sco quels ella televisiun.

Ils umens che han ligiau la suga entuorn mias combas entscheivan tuttenina a dumbrar: "Treis ... dus ... in!" Senza patertgar aunc enzatgei segliel jeu cul tgau ordavon giu dalla punt. Jeu giblel. Il sentiment ei strusch da descriver: Legria, plascher e tema empleinan mei il medem mument.

"Jeu hai gudignau il cumbat encunter la tema! Jeu sun sco quels ella televisiun!", va ei tut in denter gl'auter tras miu tgau. Pli bia sai jeu gnanc patertgar, perquei che la suga elastica tila puspei mei ensiviars. Lu crodel jeu aunc inaga. Quei serepeta pliras gadas, aschia ch'jeu vegnel tut stuorns. Tuttenina pendel jeu mureri cul tgau engiu. Biars meters sut mei vesel jeu il Rein. L'aua ei in tec tschuffa dalla plievgia. Jeu sun tut bletschs dil suadetsch. Ussa survegn jeu puspei tema e siarel perquei mes eglis. Lu s'imageschel jeu tgei eglions che mes amitgs vegnan a far, sch'jeu raquentel da mia bravura. Per cletg ha in um priu si miu segl culla camera, schiglioc cartess probabel gnanc enzatgi a mi.

La sera vesel jeu la mumma. Igl emprem ughegel jeu strusch da mirar els eglis ad ella, perquei ch'jeu hai buc fatg obedientscha. Il bab ha denton gia raquintau tut ad ella. El ha era detg ad ella ch'el hagi lubiu a mi da siglir. Tut surstaus vesel jeu co la mumma ri tuttenina enstagl da sevilar sin mei. "Ti has gie la dètga curascha", gi ella a mi.